

Ako me sjećanje dobro služi, u romanu *Travnička hronika* bosanskohercegovačkog nobelovca Ive Andrića, opisana je scena u kojoj telal po Travniku oglašava koliko je u nekakvoj bitki sa Crnogorcima poginulo Crnogoraca. Kada je neki prolaznik upitao telala koliko je poginulo naših, ovaj mu je odgovorio “E, to, oglašava njihov telal na Cetinju”.

Posljednjih dana se često sjetim ove scene (ako je i nisam baš doslovno prepričala, ne zamjerite, daavno se čitala lektira)... Nema dana kada mene, a i svakoga od nas, ne bombarduju izjavama i saopćenjima u kojima se, uglavnom, govori o tome kako je “njima”...

Ma, nema veze što smo na granici socijalnog bunta, vidite kako je drugima, jedni su dužni milijarde eura, drugima se povlače strani investitori sa prijetnjom odmazde (finansijske, naravno), trećima se oduzimaju kuće pod hipotekama... Umorna sam od ganjanja “telala sa Cetinja” ili odakle već, da bih saznala kako je nama...

Dakle, Andrićev telal je po onoj narodnoj “Veži konja gdje ti aga kaže”, u 19. vijeku oglašavao ono što mu je naredeno. Kod nas, u 21. vijeku, sve je više aga, koji se ponašaju je-

dnako kao i Andrićev telal.

Pa nas ubiše pričom kako je “njima”, a nijedan aga u ulozi telala da se ohrabri i objasni, naprimjer, zašto jedino vlasti Bosne i Hercegovine nemaju nikakav plan, ni program mjera izlaska iz krize, da kaže demobiliziranim borcima, neratnim invalidima, civilnim žrtvama rata da novca za nadoknade NEMA i NEĆE ga ni biti; sve i da danas započnemo sa prodajom državne imovine u strateškim kompanijama taj proces ne može biti završen ni za godinu dana; šta smo to i gdje uprskali pa nam se strateški partner povlači iz investicije vrijedne 1,4 milijarde eura i koliko će nas koštati to “povlačenje”...

E, sad, Andrićev telal je bubnjanjem u doboš najavljivao raji ono što ima reći... Kada malo bolje razmislím, današnje age/telali sve i da hoće ne mogu govoriti kako je “nama”... Ne mogu od silnog bubnjanja oraha... Da, da, da, oraha - onih u džepovima, koji stvaraju buku puno jaču od zvuka telalovog doboša. **B**

Aida Delić

Glavna i odgovorna urednica